

Na osnovu člana 26. stav 1. Zakona o Vladi Kantona Sarajevo ("Službene novine Kantona Sarajevo", br. 7/96, 10/96, 20/98 i 4/01), te člana 7. stav 1. i člana 8. stav 3. Zakona o prikupljanju, proizvodnji i prometu sekundarnih sirovina i otpadnih materijala ("Službene novine Federacije BiH", broj 35/98), Vlada Kantona Sarajevo, na sjednici održanoj 27. juna 2002. godine, donosi

UREDBU

O NAČINU PRIKUPLJANJA, ODLAGANJA, RAZVRSTAVANJA I OBAVLJANJA OTKUPA SEKUNDARNIH SIROVINA I OTPADNOG MATERIJALA

Član 1.

Pravna i fizička lica, ako pri obavljanju djelatnosti stvaraju otpadni materijal koji se može preraditi u sekundarne sirovine, dužna su taj materijal odlagati na za to određeni prostor na kojem se otpaci prikupljaju i uskladištavaju po vrsti materijala, stanju i kvalitetu, i pripremaju za otpremu na preradu u sekundarne sirovine utvrđene standardnom tehničko-tehnološkom klasifikacijom.

Član 2.

Prostor za prikupljanje i odlaganje otpadnog materijala je ograđen, sa zatvorenim, otvorenim a natkrivenim, i otkrivenim prostorom koji treba da zadovolji sljedeće zahtjeve:

- očuvanje kvalitetne upotrebljivosti otpada za preradu u sekundarne sirovine, čuvanje od nepovoljnih klimatskih uticaja;
- provođenje zaštite pri radu u rukovanju otpadnim materijalom;
- zaštita okoliša od štetnih uticaja prikupljenog otpadnog materijala.

Član 3.

Otpadni materijal se, u količinama pogodnim za transport, prikuplja na mjestu nastanka u obliku paleta, u otvorene i zatvorene kontejnere, u odgovarajuće posude, te slaganjem komada krupnijeg i težeg otpada. Način i oblik prikupljanja treba odgovarati vrsti materijala i sredstvima za rukovanje tim materijalom, te zadovoljiti uvjete zaštite pri radu.

Član 4.

Prikupljeni otpadni materijal i sekundarne sirovine transportuju se do korisnika odgovarajućim prijevoznim sredstvima koja jamče cjelovitost tereta i mjere sigurnosti u saobraćaju, te čuvaju kvalitet materijala ne ugrožavajući okoliš.

Član 5.

Materijal će se u prikupljenim oblicima za rukovanje odlagati na skladišnom prostoru tako da mu pristup bude olakšan, da se ne narušava upotrebljivi kvalitet materijala, da ne može doći do štetnih rasipanja, istjecanja i isparavanja koja bi ugrozila i narušila okoliš, da su osigurani uvjeti za zaštitu od požara, samozapaljivosti i paljenja uskladištenog materijala.

Sve količine materijala na odlagalištu moraju biti pregledane, dostupne za prihvaćanje, označene neophodnim karakteris- tikama i u skladišne dokumente moraju biti upisani neophodni podaci o tome materijalu.

Član 6.

Otkupom otpadnog materijala radi prerade u sekundarne sirovine i njegovim prometom do krajnjeg korisnika mogu se baviti pravna i fizička lica koja zadovoljavaju uvjete iz člana 5. Zakona o prikupljanju, proizvodnji i prometu sekundarnih sirovina i otpadnih materijala ("Službene novine Federacije BiH", broj 35/98) (u daljem tekstu: Zakon), koja imaju sklopljene međusobne komercijalno-tehničke ugovore o otkupu i poslovno-tehničkoj saradnji.

Ugovor iz prethodnog stava sadrži naročito imena lica koja stupaju u ugovorni odnos, mjesto nastanka materijala koji je predmet otkupa, način prijevoza, cijenu i ostala pitanja od zajedničkog interesa.

Član 7.

Pri obavljanju otkupa otpadnog materijala od građana otkupljivač je obavezan sastaviti otkupni dokument u koji se upisuju, naročito, sljedeći podaci: ime i prezime donosioca materijala, porijeklo materijala koji se otkupljuje, osnovni podaci o materijalu, te drugi podaci bitni za valjanost otkupa.

Član 8.

Pravna i fizička lica otkupljuju otpadni materijal i sekundarne sirovine na prostoru uređenom za tu svrhu, određenom kao otkupno mjesto koje se evidentira pri registrowanju djelatnosti.

Član 9.

Otkupno mjesto treba raspolagati potrebnim zatvorenim, natkrivenim i otvorenim prostorom za prijem i mjerenje materijala koji se otkupljuje i za rukovanje materijalom.

U skladu sa vrstom materijala koji se otkupljuje, navedenoj u registraciji djelatnosti, otkupno mjesto mora imati odgovarajuće mjerne instrumente potrebnog mjernog područja, sredstva i opremu za uskladištenje i za transportne manipulacije.

Član 10.

Stručna komisija, koju imenuje Ministarstvo privrede, će izvršiti uvid u tehničku dokumentaciju, poslovni prostor, opremljenost poslovnog prostora, te način na koji pravna i fizička lica prikupljaju, odlažu i razvrstavaju otpad.

Ministarstvo privrede Kantona će izdavati rješenje o zadovoljavanju uvjeta navedenih u Zakonu, u Pravilniku o uvjetima tehničke opremljenosti poslovnih prostora za obavljanje djelatnosti prikupljanja, prerade i proizvodnje otpadnih materijala i sekundarnih sirovina ("Službene novine Federacije BiH", broj 3/00), i u ovoj uredbi.

Član 11.

Ova uredba stupa na snagu danom objavljivanja u "Službenim novinama Kantona Sarajevo".

Broj 02-05-12477-4/02
27. juna 2002. godine
Sarajevo

Premijer
Nermin Pećanac, s. r.